

Uunga siunnersuut: Eqqumiitsuliornermik ingerlatsineq pillugu Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2019-imeersoq
(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

Saqqummiussissut

Siullermeerneqarnera

Eqqumiitsuliornermik ingerlatsineq pillugu Inatsisartut inatsisaannik allanngortinneqarnera pillugu Inatsisartut inatsisissaattut siunnersuut matumuuna Naalakkersuisut sinnerlugit saqqummiuppara.

Siunnersuut 2018-imi ukiakkut ataatsimiinnermi aalajangiiffigisassatut siunnersuutip akuerineqarneranut malitseqartitsinertut isigineqassaaq, tassani aalajangerneqarsimavoq Naalakkersuisut kingusinnerpaamik 2019-imi ukiakkut ataatsimiinnermi inatsimmut atuuttumut allannguutissatut siunnersuusiussasut, taamaalilluni eqqumiitsulianut tamanut aningaasanik agguaassinerni politikereit akuliutinnginnissaat siunertaralugu eqqumiitsuliortunut aningaasaateqarfimmik pilersitsisoqarniassammat.

Siunnersuuteqarnermi aningaasaateqarfimmik Naalakkersuisut eqqumiitsuliornermik ingerlatsisunut aningaasanik agguaassisinnaasumik pilersitsinissaannut inatsisitigut tunngavissaqartoqalerluni. Aningaasaateqarfimmik pilersitsineq ilutigalugu Inatsisartut inatsisaanni aalajangersakkanik allanik iluarsaassisoqartariaqarsimavoq.

Siunnersuullu tassaavoq inatsisitigut tunngavigisat pillugit aalajangersagaq, tassani allasimavoq Naalakkersuisut eqqumiitsuliornermik tamakkuninngalu siammarterineramik ingerlatsisunut tapiissutissaannik tamakkiisumik ilaannakortumilluunniit isumaginnittussamik aningaasaateqarfimmik pilersitsisinnaasut.

Taassuma saniatigut siunnersuummi allasimavortaaq aningaasaateqarfimmik pilersitsisoqarpat aningaasaateqarfik tapiissutinik, kingornussanik tunissutinillu Nunatta Karsianiunngitsoq pissarsisinnaasoq. Inuit tunissuteqarusuttut Nunatta Karsianit tapiissutigineqartunut allanut ilanngullugit agguaanneqartartunik tapiissuteqarnissaat maannamut periarfissaasimannngilaq, taamaattorli aningaasaateqarfimmik pilersitsisoqarpat tamanna tunngavilerneqarsinnaalissaaq.

Taassuma saniatigut siunnersuummi suliarinniisarnermut ingerlatsinermilu inatsisitigut malitarisassat ilanngunneqarsimapput, aningaasaateqarfissap aalajangigaani, maalaarfissat suunersut aammalu nakkutilliinnermi malittarisassat.

Taamatut oqaaseqarlunga siunnersuut Inatsisartuni suliarineqartussanngorlugu ingerlateqqippara.